0.0.1 cūļavedallasuttam (excerpt)

- **21.** kati panayye vedanāti? tisso kho imā āvuso visākha vedanā: sukhā vedanā, dukkhā vedanā, adukkhamasukhā vedanāti.
- 22. katamā panayye sukhā vedanā, katamā dukkhā vedanā, katamā adukkhamasukhā vedanāti?. yam kho āvuso visākha kāyikam vā cetasikam vā sukham sātam vedayitam, ayam sukhā vedanā. yam kho āvuso visākha kāyikam vā cetasikam vā dukkham asātam vedayitam, ayam dukkhā vedanā. yam kho āvuso visākha kāyikam vā cetasikam vā nevasātam nāsātam vedayitam, ayam adukkhamasukhā vedanāti.
- 23. sukhā panayye vedanā kiṃsukhā, kiṃdukkhā? dukkhā vedanā kiṃdukkhā kiṃsukhā? adukkhamasukhā vedanā kiṃsukhā kiṃdukkhāti?. sukhā kho āvuso visākha vedanā ṭhitisukhā vipariṇāmadukkhā, dukkhā vedanā ṭhitidukkhā vipariṇāmasukhā, adukkhamasukhā vedanā ñāṇasukhā aññāṇadukkhāti.
- 24. sukhāya panayye vedanāya kim anusayo anuseti? dukkhāya vedanāya kim anusayo anuseti? adukkhamasukhāya vedanāya kim anusayo anusetīti? sukhāya kho āvuso visākha vedanāya rāgānusayo anuseti. dukkhāya vedanāya paṭighānusayo anuseti. adukkhamasukhāya vedanāya avijjānusayo anusetīti.

- 25. sabbāya nu kho ayye sukhāya vedanāya rāgānusayo anuseti? sabbāya dukkhāya vedanāya paṭighānusayo anuseti? sabbāya adukkhamasukhāya vedanāya avijjānusayo anusetīti? na kho āvuso visākha sabbāya sukhāya vedanāya rāgānusayo anuseti. na sabbāya dukkhāya vedanāya paṭighānusayo anuseti. na sabbāya adukkhamasukhāya vedanāya avijjānusayo anusetīti,
- 26. sukhāya panayye vedanāya kim pahātabbam? dukkhāya vedanāya kim pahātabbam? adukkhamasukhāya vedanāya kim pahātabba'nti? sukhāya kho āvuso visākha vedanāya rāgānusayo pahātabbo. dukkhāya vedanāya paṭighānusayo pahātabbo. adukkhamasukhāya vedanāya avijjānusayo pahātabbo'ti.
- 27. sabbāya nu kho ayye sukhāya vedanāya rāgānusayo pahātabbo? sabbāya dukkhāya vedanāya paţighānusayo pahātabbo? sabbāya adukkhamasukhāya vedanāya avijjānusayo pahātabbo'ti? na kho āvuso visākha sabbāya sukhāya vedanāya rāgānusayo pahātabbo. na sabbāya dukkhāya vedanāya paṭighānusayo pahātabbo. na sabbāya adukkhamasukhāya vedanāya avijjānusayo pahātabbo. idhāvuso visākha bhikkhu vivicceva kāmehi vivicca akusalehi dhammehi savitakkam savicāram vivekajam pītisukham paṭhamam jhānam upasampajja viharati. rāgam tena pajahati. na tattha rāgānusayo anuseti. idhāvuso visākha bhikkhu iti paṭisañcikkhati: 'kudassu nāmāham tadāyatanam upasampajja viharissāmi, yadariyā etarahi āyatanam

upasampajja viharantī'ti. iti anuttaresu vimokkhesu piham upaṭṭhāpayato uppajjati, pihappaccayā domanassam. paṭigham tena pajahati. na tattha paṭighānusayo anuseti. idhāvuso visākha bhikkhu sukhassa ca pahānā dukkhassa ca pahānā pubbeva somanassadomanassānam atthaṅgamā adukkham asukham upekkhāsatipārisuddhim catuttham jhānam upasampajja viharati. avijjam tena pajahati. na tattha avijjānusayo anusetīti.

- **28.** sukhāya panayye vedanāya kim paṭibhāgoti?. sukhāya kho āvuso visākha vedanāya dukkhā vedanā paṭibhāgoti.
- **29.** dukkhāya panayye vedanāya kim paṭibhāgoti? dukkhāya kho āvuso visākha vedanāya sukhā vedanā paṭibhāgoti.
- **30.** adukkhamasukhāya panayye vedanāya kim paţibhāgoti? adukkhamasukhāya kho āvuso visākha vedanāya avijjā paţibhāgoti.
- **31.** avijjāya panayye kim paţibhāgoti? avijjāya kho āvuso visākha vijjā paţibhāgoti.
- **32.** vijjāya panayye kim paṭibhāgoti? vijjāya kho āvuso visākha vimutti paṭibhāgoti.

- **33.** vimuttiyā panayye kim paţibhāgoti? vimuttiyā kho āvuso visākha nibbānam paţibhāgoti.
- 34. nibbānassa panayye kim paṭibhāgoti? accasarāvuso¹ visākha pañham. nāsakkhi pañhānam pariyantam gahetum. nibbānogadham hi āvuso visākha brahmacariyam nibbāna parāyanam nibbāna pariyosānam. ākaṅkhamāno ca tvam² āvuso visākha bhagavantam upasaṅkamitvā etamattham puccheyyāsi, yathā ca te bhagavā byākaroti tathā nam dhāreyyāsīti.
- 35. atha kho visākho upāsako dhammadinnāya bhikkhuniyā bhāsitam abhinanditvā anumoditvā uṭṭhāyāsanā dhammadinnam bhikkhunim abhivādetvā padakkhiṇam katvā yena bhagavā tenupasankami. upasankamitvā bhagavantam abhivādetvā ekamantam nisīdi. ekamantam nisinno kho visākho upāsako yāvatako ahosi dhammadinnāya bhikkhuniyā saddhim kathāsallāpo, tam sabbam bhagavato ārocesi.
- 36. evam vutte bhagavā visākham upāsakam etadavoca: paṇḍitā visākha dhammadinnā bhikkhunī, mahāpaññā visākha dhammadinnā bhikkhunī. mamañcepi tvam visākha etamattham puccheyyāsi, ahampi tam evamevam byākareyyam yathā tam dhammadin-

¹accayāsi āvuso (machasam)

bjt page 716

²ākankhamāno tvam (sī)

nāya bhikkhuniyā byākatam. eso cevetassa attho. evametam dhārehīti.

37. idamavoca bhagavā. attamano visākho upāsako bhagavato bhāsitam abhinandīti.

pts page 305

bjt page 718